

Naqqiut

Akissuteqaatip akissuteqaat septembarip 22-anni 2022-meersoq taarserpaa.

Akissuteqaammi allannguutissatut siunnersuut saqqummiunneqarpoq.

Kommune Qeqertalimmi aallaaveqartussamik piniarnermut aalisarnermut nakkutilliisumik 2023 aallarnerfigalu atorfeqartitsilernissaq siunertaralugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Kristian Jeremiassen, Inuit Ataqtigiit)

Nunap immikkoortuini Uummannami Upernavimmilu najugaqartunik piniarnermut nakkutilliisoqalernissaa sulissuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Jens Kristian Therkelsen, Siumut)

Akissuteqaat

(Aalisarnermut Piniarnermullu Naalakkersuisoq)

Siullermeenera

Naalakkersuisut siunnersuuteqartut, Inatsisartunut ilaasortat Kristian Jeremiassen, Inuit Ataqtigiit aamma Jens Therkelsen, Siumut, Kommune Qeqertalimmi sumiiffimmi aallaaveqartussamik piniarnermik aalisarnermillu nakkutilliisoqalernissaata aamma Uummannami Upernavimmilu aallaaveqartussamik piniarnermik nakkutilliisoqalernissaata qulakkeerqarnissaanik Naalakkersuisut peqquneqarnissaanik Inatsisartut aalajangiiffigisassaattut siunnersuutaat pillugit qutsavigaat.

Tamassumunnga oqaatigissavara Kalaallit Nunaanni maannakkut sisamanik piniarnermik nakkutilliisoqartoq arfineq marlunnillu aalisarnermik nakkutilliisoqartoq, taakkununnga ilanngunneqassapput aalisarnermik piniarnermillu nakkutilliisutut ilinniartut arfinillit ilinniarnermikk aggustusimi aallartitsisut. Tamassuma saniatigut Ilulissani, Sisimiuni Nuummilu nunap immikkoortuini allaffinni aqutsisut pingasuupput.

Ilulissani, Sisimiuni Nuummilu nunap immikkoortuini pingasunik allaffeqarluni aqutsinermi nakkutilliinermilu aaqqissuussaanermik nutaamik 2020-mi 2021-milu atuutilersitsineq sumiiffinni unioqqutitsiffiunerussaasuni unioqqutitsinernilu ajoqusiineruffigisinnaasaanni nakkutilliinissamik tunngaveqarpoq. Aqutsisoqarfiit Upernavik, Uummannaq, Qasigianguit, Kitsissunguit, Arfersiorfik Nassuttoorlu Ilulissani nunap immikkoortuini allaffinnit allanit imaluunniit Arktisk Kommandomit taparserneqartarlutik nakkutigineqarput, KANUAANA-lu nakkutilliartornermi piniarnermik aalisarnermillu nakkutilliisunik angallatini arlaleriarluni ilaatitaqartarpoq.

Nunap immikkoortuini allaffinnut tamanut nakkutilliinermi angallatinik, Poca 770-inik, nutaanik pingasunik pisinissaq 2022-mi aallartisarneqarpoq. Nakkutilliinermi angallatit sinerissap qanittuani, tassunga ilanngullugit Kommune Qeqertalimmi, Uummannami Upernavimmilu, nakkutilliineq pitsaangortissavaat. Naalakkersuisut tamassuma saniatigut nakkutilliinermi angallammik angisuumik pisinissaq Aningaasaqarnermut Ataasimiititaliap akuersissuteqarneratigut aallartisisimapput. Angallat taanna allaffittut nuunneqartartut

nakkutilliinermi sillimanermi atorneqartassaaq, tamassumanilu avinngarusimanerusuni nakkutilliisarnissaq annertunerulersissavaa. Naalakkersuisut taamaasillutik naatsorsuuteqarput sumiiffinni nakkutilliinerup sukaterneqaaqqinnissaanut tunngavisseereerlutik.

Tamassumunnga ilanngunneqassaaq Kommune Qeqertalimmi ataavartumik piniarnermik aalisarnermillu nakkutilliisoqalissappat pilersitsineq 2 mio. kr-nik akeqassasoq tamassumalu kingorna ingerlatsinermut aningaasartuutit ukiumut 1 mio. kr-t missaanniissasut. Aamma missingerneqarpoq Ummannami Upernavimmilu aallaaveqartunik ataavartunik piniarnermik nakkutilliisoqalissappat pilersitsinermi aningaasartuutit 4 mio kr-it missaanniissasut, taakkunungalugu ingerlatsinermut aningaasartuutit ukiumut 2 mio. kr-t missaanniissasut. Kalaallit Nunaata aningaasaqarnermi maannakkut inissisimanagera pissutigalugu Kalaallit Nunaanni Aalisarsinnaanermut Akuersissutinik Nakkutilliisoqarfik siparniaqquneqarpoq taamaammallu Kommune Qeqertalimmi aamma Ummannami Upernavimmilu piniarnermik aalisarnermillu nakkutilliisoqalernissaanut Kalaallit Nunaanni Aalisarsinnaanermut Akuersissutinik Nakkutilliisoqarfiup sulianik maannakkut ingerlatsineranut annertuunik kinguneqartinnagu aningaasanik aningaasaliissutaareersut iluini immikkoortitsisoqarsinnaanngilaq.

Naalakkersuisut siunnersuuteqartut siunertai soorunami paasisinnaalluarpaat tamakkiisumillu suliaqarfimmik nalilersuinissaminut piunassuseqarlutik. Sumiiffiit pineqartut pingasut pillugit siunnersuuteqartut siunnersuutaat aallaavigigaanni aningaasanik 9 mio. kr.-inik pisariaqartitsisoqassaaq.

Naalakkersuisut qulaani toqqammavilersuutit aallaavigalugit inassutigissavaat imatut allannguutissatut siunnersuuteqarnissaq:

Piniarnermut aalisarnermullu nakkutilliisoqarnerup tamakkiisumik nalilersorneqarnissaanut periusissiorfigineqarnissaanullu Naalakkersuisut peqquneqarnissaannik Inatsisartut aalajangiiffigisassaattut siunnersuut. Nalilersuineq periusissiornerlu UKA 2023-mi Inatsisartunut kingusinnerpaamik saqqummiunneqassaaq. Tassanilu nunap immikkoortuini aaqqissusseqqinnikkut nakkutilliisoqarnikkut pitsanngorsaannissat isiginiarneqassallutik.

Taamatut oqaaseqarlunga Inatsisartunut oqaluuserisassanngortippara.